

Meeqqap illugiimmik angajoqqaaminik takunninnissaanut pisinnaatitaaffeqarnera naapertorlugu, tamannalu meeqqamut pitsaanerussappat, qanoq ililluta Inatsisartuni pilersaarusiussisarnermut pitsanngorsaaqataasinnaavugut. Taamatuttaaq ataataasut meeqqaminnik attavigissaarnerunissaannut pitsaanusunik periarfissiissagutta meeqqaminnik tigummiqarsinnaanerit eqqarsaatigalugu ilaqutariit pillugit inatsisaatigut qanoq nutarterisinnaavugut. Aaqqiagiinngittoqartillugu isumaqatigiissitsiniarnissanut periarfissaqarnerunissaq, taamatullu meeqqap peqatiginissaagaluanik eqquutsitsisoqanngippat iliuseqarnissamut periarfissiinissat Inatsisartuni sulissutigisariaqarpavut.

(Inatsisartuni ilaasortaq Aaja Chemnitz Larsen, Inuit Ataqtigiit)

Akissuteqaat

(Pinnngortitamut, Avatangiisinut Inatsisinillu Atuutsitsinermut Naalakkersuisoq)

Naalakkersuisut siunnersuut soqutigalugu atuarpaat, aammalu ajornartorsiut soqutiginaatik tamanna saqqummiunneqarmat qujassutigaat.

Meeqqat akuutinneqarnissamut tusarnaarneqarnissamullu pisinnaatitaapput. Meeqqat angajoqqaanut illugiinnut attaveqarnissaq pisinnaatitaaffigaat – aammaluunniit qimassimagaluarpata. Angajoqqaatut oqartussaaneq, najuunneq najugaqarnerlu meeqqamut pitsaanerpaaq aallaavigalugu aalajangiiffigineqartassapput. Tunngavissat taakku ilaqutariinnut inatsisini ataatsimoortuni, ataatsimiinnermi matumani saqqummiunneqartuni erseqqissarneqarput.

Taamaattumik meeqqap angajoqqaanut illugiinnut attaveqarnissaat tunngavissaavoq, Naalakkersuisunit tapersorneqartoq. Ilaqutariinnermut inatsisini ataatsimoortuni angajoqqaat akisussaanerat nutaamik aallaavilerneqarpoq. Meeraq angajoqqaanut illugiinnut attaveqarnissamut pisinnaatitaaffeqartoq, angajoqqaat meeqqamut pisinnaatitaaffeqarnera pineqarani. Tassalu meeqqamut pitsaaneruppat, angajoqqaat ataatsimoorlutik angajoqqaatut oqartussaaffeqassapput. Ataatsimut angajoqqaatut oqartussaaffeqarnermut anaanap ataallu tamaasa najornissaasa meeqqamut pitsaanerpaaneramik eqqarsaateqarneq aallaavigineqarpoq.

Angajoqqaatut oqartussaaneq pillugu suliani aaqqiagiinngissuteqarnermi isumaqatigiissitsiniarsinnaanerup atuutsinneqalernissaa siunnersuutigineqarpoq. Eqqarsaammut tassunga Naalakkersuisut tapersiippat, isumaqatigiissitsiniartarneq arlalitsigut iluaqutaasartoq pisunilu arlalinni pinaveersaartitsissutaasartoq paasinarsisimammat.

Aaqqiagiinngitsoqarnerani isumaqatigiissitsiniartarneq iluatsissappat, isumaqatigiissitsiniartooq sapinngisamik siusinnerpaamik aallartittariaqarpoq. Aaqqiagiinnginneq annertusivallaarsimappat, aaqqiagiinngitsoqarnerani isumaqatigiissitsiniarneq qaqutigunnaq iluaqutaasinnaavoq. Maannarpiaq isumaqatigiissitsiniartartut ilinniarsimasut, suliassamik isumaginnissinnaasut ikittuaraannaapput. Aaqqiagiinnginnermi isumaqatigiissitsiniartarnerup Kalaallit Nunaat tamakkerlugu neqeroorutigineqarsinnaanissaa siunnersuummi siunnerfigineqarpoq. Taamaattumik amerlanerusut qanoq iliorlutik suliassamik isumaginnissinnaanissamut

piginnaaneqalersinnaanersut aammalu qanoq ililluni aaqqiagiinngitsoqarnerani isumaqatigiissitsiniartarneq illoqarfinnut nunaqarfinnullu anngunneqarsinnaanersoq misissorneqassaaq.

Ilaqutariinnut tamarmiusunut aaqqiissutissanik nassarnissaq Naalackersuisut soqutigisaraat, aammalu meeqqat tusaaneqarnissaat akuutinneqarnissaallu immikkut isiginiarlugu. Naalackersuisut isumaat malillugu ilaqutariit imminerminni isumalluutissanik arlalinnik pigisaqartarput, amerlasuutigullu imminnut pitsaanerpaaq suunersoq ilisimalluarnerusarlugu. Pisuni meeqqamut ilaqutariinnullu pitsaanerpaasuni ilaqutariit namminneerlutik ilaqutariit pillugit aalajangiinernut annertuumik sunniuteqarsinnaasariaqarput.

Oqallilluarnissamut qilanaarpunga – aammalu saqqummiussat, siunissami atorneqarsinnaasut tusarnaarnissaat qilanaaraara.